

Na osnovu člana 16. stav 2. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj: 7/10 i 3/23) i člana 4. stav 1. Zakona o koncesijama - Prečišćeni tekst („Službene novine Zeničko-dobojskog kantona“, broj: 5/03), na prijedlog Ministarstva za privredu, Vlada Zeničko-dobojskog kantona, na 16. sjednici, održanoj dana 09.02.2024. godine, d o n o s i

ODLUKU

o pristupanju provođenju procedure dodjele koncesije za istraživanje i eksploataciju mineralnog resursa lerzolita na ležištu Klanci, K.O. Strupina, Općina Maglaj

Član 1. (Predmet)

Pristupa se provođenju procedure dodjele koncesije za istraživanje i eksploataciju mineralnog resursa lerzolita na ležištu Klanci, K.O. Strupina, Općina Maglaj.

Član 2. (Lokacija)

(1) Koncesiono polje za istraživanje i eksploataciju mineralnog resursa lerzolita na ležištu Klanci, K.O. Strupina, Općina Maglaj ograničeno je graničnim linijama sa prijelomnim tačkama, kako slijedi:

Broj tačke	Y	X
A	6 502 118,953	4 933 031,953
B	6 502 351,185	4 933 185,653
C	6 502 427,807	4 933 075,204
D	6 502 632,099	4 933 034,842
E	6 502 456,262	4 933 689,089
A	6 502 118,953	4 933 031,953

(2) Površina koncesionog područja „Klanci“, K.O. Strupina, Općina Maglaj iznosi 11,78 ha i obuhvata dio nekretnine označene sa k.č. broj 9/1 „Bijeli klanci“ šuma 4. i 6. klase ukupne površine 3036280 m², upisane u pl. broj 26 K.O. Strupina, posjednik Tvornica Natron sa 1/1, po katastru zemljišta, a prema podacima zemljišne knjige odnosi se na k.č. 9/1 u istoj površini upisana u zk. uložak broj 27 K.O. Strupina, Državna svojina sa 1/1, organ upravljanja Zeničko-dobojski kanton-Kantonalna uprava za šumarstvo.

Član 3. (Opći eliminatorni uslovi)

(1) Opći eliminatorni uslovi za izbor najpovoljnije ponude za dodjelu koncesije za istraživanje i eksploataciju mineralnog resursa lerzolita na ležištu Klanci, K.O. Strupina, Općina Maglaj su slijedeći:

a) Studija o ekonomskoj opravdanosti dodjele koncesije za istraživanje i eksploataciju lerzolita

na ležištu Klanci, K.O. Strupina, Općina Maglaj,

- b) Dokaz o ranije stečenim pravima korištenja predmeta koncesije po osnovu vlasništva nad zemljištem i objektima ili odobrenja drugih organa dobivenih na osnovu posebnih zakona, u slučajevima kada je to neophodno za korištenje predmeta koncesije.

(2) Opći eliminatorni uslovi vezani za ličnu i profesionalna sposobnost privrednog društva su sljedeći:

- a) Uvjerjenje nadležnog suda da nije pravosnažno osuđen za krivično djelo i/ili prekršaj u vezi sa obavljanjem privredne djelatnosti (počinjen u periodu 3 godine prije početka postupka dodjele koncesije ili od datuma registracije odnosno početka poslovanja, ako je ponuđač registrovan ili je počeo sa radom prije manje od 3 godine),
- b) Uvjerjenje nadležnog organa da nije predmet stečaja ili likvidacije i da nije u postupku stečaja ili likvidacije,
- c) Uvjerjenje nadležnog organa o izmirenim javnim prihodima (porezi, indirektni porezi, doprinosi za PIO/MIO i plaćenju koncesionoj naknadi),
- d) Aktuelno rješenje o upisu u sudski registar.

(3) Dokazi se dostavljaju u originalu ili ovjerenoj kopiji i ne mogu biti stariji 3 mjeseca od dana dostavljanja ponude.

(4) Opći eliminatorni uslovi vezani za ekonomsku i finansijsku sposobnost privrednog društva su sljedeći:

- a) Izvod iz Jedinog registra računa Centralne banke BiH o svim računima ponuđača,
- b) Potvrda poslovne banke ponuđača da njegov glavni transakcijski račun nije bio blokiran u prethodnih 6 mjeseci ili od datuma registracije odnosno od početka poslovanja ako je ponuđač registrovan ili je počeo sa radom prije manje od 6 mjeseci.

Član 4.

(Posebni uslovi)

Posebni uslovi za izbor najpovoljnije ponude za dodjelu koncesije za istraživanje i eksploataciju lersolita na ležištu Klanci, K.O. Strupina, Općina Maglaj su:

- a) Vrijeme koncesije na ovom polju je 3 godine od dana potpisivanja Ugovora o koncesiji,
- b) Vrijeme koncesije za istraživanje je 1 godina. Ovo vrijeme počinje od dana dobijanja Odobrenja za geološka istraživanja mineralne sirovine od nadležnog organa,
- c) Vrijeme koncesije za istraživanje se može produžiti shodno važećim materijalnim propisima, ali u vremenskom okviru od 3 (tri) godine u skladu sa tačkom a) ovog člana, dok se preostali period (do 3 godine) odnosi na eksploataciju mineralne sirovine,
- d) Koncesionar je dužan početi sa istraživanjima u roku od jedne godine od dana potpisivanja Ugovora o koncesiji, i ovo vrijeme je uključeno u ukupan period koncesije od 3 godine,
- e) Koncesionar je dužan plaćati kontinuiranu koncesionu naknadu od dana dobijanja Odobrenja za rad po Glavnom rudarskom projektu od nadležnog organa,
- f) Koncesionar je dužan u roku od jedne godine nakon završenih istražnih radova, to jest potvrđenih geoloških rezervi Rješenjem nadležnog organa, početi sa eksploatacijom mineralne sirovine, i ovo vrijeme je uključeno u ukupan period koncesije od 3 godine,
- g) Za eksploatisane količine mineralne sirovine lersolita koncesionar je dužan plaćati koncesionu naknadu u iznosu minimalno 0,90 KM/m³ čvrste mase (slovima: devedeset pfeninga po m³ čvrste mase),
- h) Minimalna količina eksploatisane mineralne sirovine za koju je koncesionar obavezan plaćati kontinuiranu koncesionu naknadu je 40.000,00 m³/godini čvrste mase (slovima: četrdeset hiljada m³ u godini),
- i) Minimalna jednokratna koncesiona naknada, regulisana Odlukom o utvrđivanju minimalnih naknada za koncesije („Službene novine Zeničko-dobojskog kantona“, broj: 6/13, 16/18 i 9/20), je 1.000,00 KM/ha istražno-eksploatacionog prostora, pa za istražno-eksploatacioni prostor na ležištu „Klanci“, K.O. Strupina, Općina Maglaj, ukupne površine 11,78 ha, minimalna jednokratna koncesiona naknada iznosi 11.780,00 KM (slovima: jedanaest hiljada sedamstotina osamdeset KM).

Član 5. **(Ostali uslovi)**

(1) Ostali uslovi za izbor najpovoljnije ponude za dodjelu koncesije uključuju da će se koncesija dodijeliti prema kriteriju najpovoljnijeg ponuđača, odnosno po principu najvećeg zbira bodova po osnovu kriterija iz javnog poziva, koji uključuju visinu kontinuirane koncesione naknade, visinu jednokratne koncesione naknade, minimalnu godišnju realizaciju predmeta koncesije, kao i na osnovu općih kriterija dodjele koncesije za istraživanje i eksploataciju.

(2) Vrednovanja ponuda vrši se na sljedeći način:

- | | |
|--|--------------|
| a) <u>kontinuirana koncesiona naknada</u>
bodova;
Ponuđač sa najvišom ponudom dobija 60 (šezdeset) bodova.
Svaka naredna niža ponuda dobija 5 (pet) bodova manje. | maximalno 60 |
| b) <u>jednokratna koncesiona naknada</u>
bodova;
Ponuđač sa najvišom ponudom dobija 20 (dvadeset) bodova.
Svaka naredna niža ponuda dobija 5 (pet) bodova manje. | maximalno 20 |
| c) <u>minimalna godišnja realizacija</u>
bodova;
Ponuđač sa najvišom ponudom dobija 20 (dvadeset) bodova.
Svaka naredna niža ponuda dobija 5 (pet) bodova manje. | maximalno 20 |

(3) U slučaju da su dvije ili više ponuda jednako rangirane po broju bodova, prednost ima ponuda sa najvišom kontinuiranom koncesionom naknadom. U slučaju da su dvije ili više ponuda jednako rangirane po broju bodova i nude jednak iznos kontinuirane koncesione naknade, prednost ima ponuda sa najvišom jednokratnom koncesionom naknadom. U slučaju da su dvije ili više ponuda jednako rangirane po broju bodova i nude jednak iznos kontinuirane i jednokratne koncesione naknade, prednost ima ponuda koja je zaprimljena ranije.

(4) Privredno društvo, koje je ponuđač u postupku dodjele koncesije, dužno je dostaviti Izjavu, ovjerenu od strane nadležnog organa, kojom se pod punom materijalnom i krivičnom odgovornošću obavezuje da će, nakon donošenja Odluke o dodjeli koncesije, sa Općinom Maglaj potpisati Sporazum kojim će se regulisati njegove obaveze prema Općini Maglaj i to:

- a) da je dužan kao izvođač istražno-eksploatacionih radova spriječiti nastanak štetnih posljedica po druge subjekte i okoliš,
- b) da izvršava obaveze naknade svih troškova za otklanjanje šteta nastalih kao posljedica istražno-eksploatacionih radova,
- c) da ima obavezu da poduzme mjere i aktivnosti na sanaciji klizišta u naseljenim mjestima Radojičići, Galovac i Strupina, a ukoliko se utvrdi da su ista izazvana promjenama u prostoru usljed aktivnosti i izvođenja istražno-eksploatacionih radova i da vršenjem koncesione djelatnosti ne smije ugroziti postojeća izvorišta vode za piće, vodoprivredne objekte za snadbjevanje naselja vodom i vodotoke kao putne komunikacije koje koristi u toku istražnih radova i eksploatacionog perioda i iste je dužan sanirati odnosno nadoknaditi bilo kakvu štetu koju načini istim.

(5) Najpovoljniji ponuđač-koncesionar dužan je, prije potpisivanja koncesionog ugovora, Ministarstvu za privredu dostaviti:

- a) geodetski elaborat „nultog stanja“,
- b) uplatnicu na iznos jednokratne koncesione naknade,
- c) ovjerenu 1 mjenicu sa mjeničnom izjavom na ukupan iznos minimalne godišnje kontinuirane koncesione naknade,
- d) Sporazum potpisan sa Općinom Maglaj u skladu sa čl. 5 stav (4) ove odluke.

(6) Najpovoljniji ponuđač- koncesionar dužan je u roku od jedne godine od potpisa Ugovora o koncesiji, izvršiti upis koncesionog prava u Zemljišne knjige i dostaviti Ministarstvu za privredu zemljišno-knjižni izvadak sa identifikacijom parcela po starom i novom premjeru sa naznačenim katastarskim česticama i površinama.

(7) Najpovoljniji ponuđač - koncesionar dužan je nakon potpisa Ugovora o koncesiji, Općini Maglaj predati inicijativu za pokretanje postupka izmjene Prostornog plana Općine Maglaj („Službeni glasnik Općine Maglaj“, broj: 2/90 i 1/13) kako bi se navedeni lokalitet po namjeni odredio kao rudarski proctor, s obzirom da je Općinsko vijeće Maglaj Odlukom, broj: 02-04-1-1449/23 od 07.09.2023. godine dalo svoju saglasnost za istražno-eksploatacione radove na ovom lokalitetu, jer, u suprotnom, koncesionar neće moći ishodovati potrebne dozvole za istražno-eksploatacione radove.

Član 6. (Eksploatacija)

Radove eksploatacije, kao i sve druge prateće rudarske poslove, koncesionar je dužan izvoditi u skladu sa odredbama važećih zakona i propisa kojima je uređena oblast istraživanja i eksploatacije mineralnih resursa, te drugih važećih zakonskih propisa.

Član 7. (Provođenje postupka izbora)

Zadužuje se Ministarstvo za privredu da, putem Komisije koju imenuje ministar Ministarstva za privredu, provede postupak prikupljanja ponuda, izvrši odabir i predloži Ministarstvu za privredu najpovoljnijeg ponuđača.

Član 8. (Stupanje na snagu)

Odluka stupa na snagu danom donošenja i bit će objavljena u „Službenim novinama Zeničko-dobojskog kantona“.

PREMIJER

Nezir Pivić

Broj: 02-14-2663/24

Datum, 09.02.2024. godine

Z e n i c a

DOSTAVLJENO:

1x Ministarstvo za privredu,

1x Ministarstvo za prostorno uređenje, promet i komunikacije
i zaštitu okoline,

1x Ministarstvo za poljoprivredu, šumarstvo i vodoprivredu,

1x Općina Maglaj, putem Ministarstva,

1x „Službene novine Zeničko-dobojskog kantona“,

1x a/a.